



CONVENIO DE COLABORACIÓN ENTRE A CONSELLERÍA DE POLÍTICA SOCIAL E A REDE GALEGA CONTRA A POBREZA (EAPN GALICIA) PARA O DESENVOLVEMENTO DE ACTUACIÓNS ENCAMIÑADAS Á COORDINACIÓN, OPTIMIZACIÓN DOS RECURSOS E SINERXIAS DE ACTUACIÓN DAS ENTIDADES INTEGRANTES QUE TEÑEN COMO FINALIDADE A LOITA CONTRA A POBREZA E A EXCLUSIÓN SOCIAL

Santiago de Compostela, 20 de setembro de 2016

REUNIDOS

Dunha parte:

Don José Manuel Rey Varela, conselleiro de Política Social da Xunta de Galicia, en virtude do Decreto 126/2015, do 4 de outubro, polo que se nomean as persoas titulares dos departamentos da Xunta de Galicia, actuando en nome e representación da Xunta de Galicia, no uso das facultades que lle veñen atribuídas no artigo 34 da Lei 1/1983, do 22 de febreiro, de normas reguladoras da Xunta e da súa presidencia, modificada pola Lei 11/1988, do 20 de outubro, no Decreto 116/2015, do 4 de outubro, polo que se modifica a estrutura orgánica da Xunta de Galicia, no Decreto 129/2015, do 8 de outubro, polo que se fixa a estrutura orgánica das consellerías da Xunta de Galicia e no Decreto 176/2015, do 3 de decembro, polo que se establece a estrutura orgánica da Consellería de Política Social.

Doutra parte:

Don Antonio Hernández Fernández, con DNI 34991240Y, presidente de EAPN, actuando en nome e representación da entidade, con NIF G70209549, como se acredita na relación de compoñentes da xunta directiva relacionada nos estatutos da dita entidade.

Ambas as dúas partes, no nome e representación no que concorren e coa capacidade legal suficiente para este acto.





MANIFESTAN

PRIMEIRO: Que a Rede Galega de Loita Contra a Pobreza e a Exclusión Social (EAPN-Galicia) é unha entidade non lucrativa e de acción social que agrupa a entidades autonómicas do terceiro sector implicadas na loita contra a pobreza e a exclusión a través da defensa dos dereitos das persoas en situación ou risco de pobreza e exclusión mediante a incidencia política e social. Atópase inscrita no Rexistro Único de Entidades Prestadoras de Servizos Sociais co número E-5769, e ten como fins, entre outros, os seguintes:

- a) Facilitar os fluxos de información entre as organizacións do terceiro sector e contribuír á formación dos seus diversos axentes.
- b) Contribuír a analizar a realidade da pobreza e a exclusión social e reflexionar sobre as súas causas e sobre as propostas para a incidencia das mesmas, promovendo estudos e investigacións, así como xornadas, seminarios e foros de reflexión e análise.
- c) Incidir nas políticas sociais desenvolvidas en Galicia, dende o ámbito europeo e estatal ata o local, con especial incidencia nas políticas deseñadas e executadas pola Xunta de Galicia.
- d) Defensa do Terceiro Sector de Acción Social como actor imprescindible no sistema de servizos sociais públicos. Fomento dun diálogo civil normalizado e estable e recoñecemento do seu orixe non lucrativo na contratación pública.
- e) Potenciar a transparencia e mellora da xestión do sector, desenvolvendo unha estratexia de calidade e responsabilidade das organizacións, así como recompilando e transferindo as boas prácticas identificadas.
- f) Facilitar a participación das persoas en risco de pobreza ou exclusión social nas entidades membro e diante das diversas administracións públicas.
- g) Sensibilizar ao conxunto da sociedade e corresponsabilizar aos axentes clave, en particular Administracións Públicas e empresas, sobre as cuestións relativas á inclusión social a través de diferentes iniciativas, como a responsabilidade social corporativa.

SEGUNDO: Que para a consecución dos ditos fins lévanse a cabo as seguintes actividades especialmente en tres liñas de actuación:

1. Sistema información compartida e traballo colaborativo e en rede

- O desenvolvemento de intranet con repositorio documentación e xestión de comunicación e formación interna.
- O compartimento de información e boas prácticas con entidades membro e con outras redes autonómicas.



- O Plan de xestión de voluntariado.
 - A realización de estudos, tales como o Estudo Así Somos e o Mapa recursos Terceiro Sector Acción Social en Galicia (ámbito urbano y rural).
 - O aseguramento do mantemento e da seguridade informática.
- 2. Incremento da capacidade de investigación e propostas de mellora na loita contra a pobreza, exclusión social e servizos sociais**
- A elaboración da estratexia e planificación EAPN Galicia.
 - A posta en marcha de talleres de identificación das prioridades servizos sociais 2016-2020 dende o Terceiro Sector Galego.
 - A realización de informes- propostas en diversas materias: vivenda, mocidade e inclusión, e rendas mínimas (RISGA).
 - A organización de foros (Foro sobre Pobreza, exclusión social, Terceiro Sector e voluntariado).
 - A resposta ás demandas, consulta e diálogo coas administracións publicas.

3. Aumento da capacidade comunicación interna e externa para difusión da mensaxe de defensa dos dereitos das persoas en situación ou risco de pobreza e exclusión, especialmente a través delas mesmas

- O mantemento dun Grupo de Comunicación operativo.
 - O desenvolvemento do Plan de comunicación externa e interna (medios de comunicación e Social Media).
- A realización de Seminarios, acompañamento deseño e implantación da campaña de comunicación spot viralizable (redes sociais e medios comunicación), anuncios webs ONG membro.
- A organización do Encontro de participación das persoas en risco de pobreza e exclusión.





- A celebración do Día de Erradicación da Pobreza 2016.

TERCEIRO: Que a Consellería de Política Social, segundo a estrutura orgánica fixada polo Decreto 176/2015, do 3 de decembro, polo que se establece a estrutura orgánica da Consellería de Política Social é o órgano que ten asumidas as competencias en materia de servizos sociais, incluíndo servizos comunitarios, as políticas de inclusión social e en favor da poboación inmigrante que lle corresponden á Xunta de Galicia.

CUARTO: Que no exercicio destas competencias considérase adecuado desenvolver unha liña de colaboración a través da subscrición dun convenio con EAPN Galicia, para facer posible o desenvolvemento das actuacións tendentes á coordinación, optimización dos recursos e sinerxías de actuacións das entidades integrantes que teñen como finalidade a loita contra a pobreza e a exclusión social. A instrumentación desta axuda por medio dun convenio de colaboración singular, reside na circunstancia de que EAPN Galicia é o único organismo existente nesta comunidade autónoma que agrupa a entidades sociais que traballan con practicamente con todas as persoas desfavorecidas e, especialmente, coas persoas que se encontran en situación ou risco de exclusión social, de acordo co establecido no artigo 3.1 da Lei 10/2013, do 27 de novembro, de inclusión social de Galicia. Neste senso, hai que ter en conta que esta entidade non pode participar nas convocatorias de subvencións de inclusión social, dado que non presta servizos directos ás persoas, senón que apoia ás entidades representantes das persoas vulnerables que conectan os seus esforzos para conseguir sinerxias e crear unha plataforma que canalice e dea voz ás demandas do sector. De acordo co cal, a Consellería de Política Social considera que a colaboración no mantemento destes servizos cumpre, indubidablemente, unha función de interese social en consonancia co establecido no artigo 19.4 c) da Lei de Subvencións de Galicia e no artigo 40 do Decreto 11/2009, do 8 de xaneiro, de desenvolvemento da anterior.

QUINTO: Que ambas as partes consideran esencial o establecemento dunha colaboración para os efectos do desenvolvemento das actividades propias de EAPN Galicia e así alcanzar os fins que serven de referencia á dita organización.

CLÁUSULAS

PRIMEIRA. Obxecto

É obxecto do presente convenio a colaboración entre a Consellería de Política Social e EAPN Galicia para a realización, por parte desta última, dunha serie de actuacións encamiñadas á coordinación, optimización dos recursos e sinerxías de actuacións das entidades integrantes que teñen como finalidade a loita contra a pobreza e a exclusión social.

SEGUNDA. Contido

A colaboración regulada neste convenio entre a Xunta de Galicia e EAPN Galicia centrarase no financiamento das actividades que aseguren a unión de esforzos, a creación de sinerxias e o incremento da eficacia e a eficiencia das actuacións das súas entidades membro, coas seguintes finalidades:



- A creación de grupos de traballo estables como ad hoc establecendo protocolos e calendarios de realización das xuntanzas, con implicación de persoas expertas e das entidades membro.
- A garantía dunha presenza activa e propositiva nos diversos foros sociais e políticos responsables do asesoramento e supervisión das políticas públicas do ámbito social en Galicia.
- O incremento da participación democrática e a incidencia social e política dos galegos e galegas en risco de pobreza e exclusión social

TERCEIRA. Obrigas de EAPN Galicia

EAPN Galicia asume as obrigas sinaladas no artigo 11 da Lei 9/2007, do 13 de xuño, de subvencións de Galicia e, en especial, acepta os seguintes compromisos como consecuencia da sinatura do presente convenio:

- 1.- Realizar as accións derivadas do obxecto do convenio.
- 2.- Acreditar a realización do obxecto así como a aplicación dos fondos ao fin destinado de acordo co establecido na cláusula oitava deste convenio.
- 3.- Non atoparse incurso en ningunha das circunstancias e prohibicións establecidas no artigo 10 da Lei 9/2007, do 13 de xuño, de subvencións de Galicia.
- 4.- Acreditar, no momento da sinatura do convenio e no momento da realización do pagamento, mediante declaración responsable da persoa que ostenta a representación da entidade de que está ao día das súas obrigas tributarias e fronte á Seguridade Social e de que non ten pendente de pagamento débedas coa Comunidade Autónoma nin é debedora por resolución de procedencia de reintegro.
- 5.- Comunicar a obtención doutras subvencións, axudas, ingresos ou recursos que financien as accións derivadas do obxecto do convenio. Esta comunicación deberá efectuarse tan pronto como se coñeza e en todo caso con anterioridade á xustificación da aplicación dada aos fondos percibidos.
- 6.- Facilitar as actuacións de comprobación e subministrar a información, requirida pola Consellería de Política Social, a través da Dirección Xeral de Inclusión Social, órgano xestor do convenio, e do Servizo de Inspección nas áreas de Servizos Comunitarios e Inclusión Social da Subdirección Xeral de Autorización e Inspección de Servizos Sociais dependente da Secretaría Xeral Técnica de Política Social; así como pola Intervención Xeral da Comunidade Autónoma, o Consello de Contas e o Tribunal de Contas, no exercicio das súas funcións de fiscalización e control. Para os efectos de comprobación administrativa, a sede de EAPN Galicia está emprazada en Santiago de Compostela, na rúa Basquiños núm. 33 1ºA, e todas as peticións de documentación deberán dirixirse a esta para acadar maior operatividade.





7.- Adecuar a forma de presentación dos datos relativos á execución das accións, así como os instrumentos xustificativos do gasto, ás fórmulas que no seu caso propoña a Consellería de Política Social, a través da Dirección Xeral de Inclusión Social.

8.- Participar nas accións de información e sensibilización relacionadas co obxecto do convenio que, se é o caso, realice a Consellería de Política Social, a través da Dirección Xeral de Inclusión Social.

9.- Cumprir as normas autonómicas de información e publicidade das intervencións financiadas pola comunidade autónoma. Así mesmo, deberá incluír a imaxe institucional da Xunta de Galicia, así como lendas relativas ao financiamento público, en carteis, placas conmemorativas, materiais impresos, medios electrónicos ou audiovisuais relativos ao programa subvencionado.

10.- Levar un arquivo e custodia, durante, polo menos, cinco anos, da documentación substantiva e financeira que soporte e acredite a realización das accións obxecto deste convenio. En particular, EAPN Galicia comprométese a achegar inescusablemente nun prazo de dez días cantas facturas, nóminas e demais documentos de carácter contable lle sexan requiridos pola Consellería de Política Social, a través da Dirección Xeral de Inclusión Social.

11.- Proceder ao reintegro dos fondos percibidos nos supostos contemplados no artigo 33 da Lei 9/2007, do 13 de xuño, de subvencións de Galicia.

12.- Subministrar á Administración toda a información necesaria para o cumprimento das obrigas previstas no Título I da Lei 1/2016, do 18 de xaneiro, de transparencia e bo goberno, coas consecuencias, no caso de incumprimento, indicadas no artigo 4 da devandita lei.

13.- Cumprir cantas outras obrigas se deriven da execución do disposto neste convenio.

CUARTA. Inclusión no Rexistro de Axudas, Subvencións e Convenios e confidencialidade dos datos

A sinatura deste convenio leva implícita a autorización da entidade para a inscrición no rexistro de convenios, de acordo co Decreto 126/2006, do 20 de xullo, polo que se regula o Rexistro de Convenios da Xunta de Galicia e a súa publicación, de conformidade co previsto na Lei 1/2016, do 18 de xaneiro, de transparencia e bo goberno e no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006.

Ambas as partes garantirán a total confidencialidade dos datos persoais aos que teñan acceso como consecuencia das actividades realizadas en execución deste convenio. EAPN Galicia obrígase ao cumprimento da normativa en materia de protección de datos de carácter persoal e, en concreto da Lei orgánica 15/1999, do 13 de decembro, de protección de datos de carácter persoal, e do Real decreto 1720/2007, do 21 de decembro, polo que se aproba o regulamento de desenvolvemento da dita lei.



QUINTA. Funcionamento

Realizarase unha avaliación das actividades desenvoltas ao abeiro do convenio co obxecto de determinar sistemática e obxectivamente a súa pertinencia, eficiencia, eficacia e o seu impacto á luz dos seus obxectivos para mellorar a intervención e para unha planificación máis satisfactoria.

SEXTA. Orzamento

A Consellería de Política Social contribuirá ao financiamento dos gastos derivados da execución deste Convenio cunha contía global de DEZAOITO MIL EUROS (18.000) con cargo á aplicación orzamentaria 2016.12.03.312A.481.3 dos orzamentos da Dirección Xeral de Inclusión Social na anualidade de 2016, na que existe crédito adecuado e suficiente (Lei 12/2015, do 24 de decembro, de orzamentos xerais da Comunidade Autónoma de Galicia para o ano 2016).

SÉTIMA. Forma de xustificación e pagamento

Respecto da forma de xustificación e pagamento estarase ao disposto na Lei 12/2015, do 24 de decembro, de orzamentos xerais da Comunidade Autónoma de Galicia para o ano 2016, ao establecido na Lei 9/2007, do 13 de xuño, de subvencións de Galicia e no Decreto 11/2009, do 8 de xaneiro, polo que se aproba o seu regulamento.

O pagamento efectuarase previa presentación dos documentos xustificativos de gasto que permitan acreditar o cumprimento do obxecto do convenio.

A data límite de xustificación, para os efectos do artigo 37.2.e) do Decreto 11/2009 polo que se aproba o regulamento da Lei 9/2007, de subvencións de Galicia, é o 15 de decembro de 2016. Non obstante, o órgano xestor do convenio poderá esixir a acreditación da xustificación da subvención con anterioridade e en función do que, no seu día, dispoña a norma que regula as operacións de pechamento do exercicio 2016.

En aplicación do artigo 29.2 da Lei 9/2007, do 13 de xuño, de subvencións de Galicia e do artigo 42 do Decreto 11/2009, do 8 de xaneiro, polo que se aproba o seu regulamento, considérase gasto realizado o que foi efectivamente pagado con anterioridade á data de finalización do período de xustificación, acreditándose este pagamento mediante extractos ou certificacións bancarias debidamente identificados, selados, e asinados pola entidade beneficiaria.

Ata o 80% da contía total concedida, o pagamento poderá facerse efectivo mediante libramentos parciais a conta da liquidación definitiva a medida en que EAPN Galicia xustifique os gastos realizados e o cumprimento da finalidade para a que foi concedida a axuda así como a aplicación dos fondos destinados para estes efectos. Estes libramentos parciais quedarán exonerados da constitución de garantías previstas no artigo 67 do Decreto 11/2009, do 8 de xaneiro, polo que se aproba o Regulamento de subvencións de Galicia, por estar incluídos no suposto recollido no apartado f) do artigo 65.4 do mesmo texto legal.



A xustificación destes libramentos parciais realizarase mediante a presentación da seguinte documentación:

- a) Unha relación clasificada dos gastos da actividade, con identificación da persoa acreedora e do documento xustificativo do gasto, o seu importe, a data de emisión e, se é o caso, a data de pagamento.
- b) Orixinal e fotocopia das facturas ou documentos de valor probatorio equivalente no tráfico xurídico mercantil ou con eficacia administrativa incorporados na relación á que se fai referencia no parágrafo anterior e a documentación acreditativa do pagamento.

Antes de facer efectivo o 20% restante, EAPN Galicia deberá presentar a seguinte conta xustificativa:

- a) Memoria de resultados que recolla as actuacións realizadas obxecto deste convenio.
- b) Memoria económica xustificativa do custo das actividades realizadas, que conterá os mesmos elementos descritos no apartado dedicado aos libramentos parciais e ademais estes outros:
 - Balance en que se reflicta a totalidade dos ingresos e gastos correspondentes á actividade obxecto do convenio.
 - Declaración que conteña unha relación detallada doutros ingresos ou subvencións que financiasen a actividade subvencionada con indicación do importe e a súa procedencia.
 - Declaración responsable que acredite a finalización das actividades programadas.

OITAVA. Gastos subvencionables

Considéranse gastos subvencionables, para os efectos previstos neste convenio, aqueles que de xeito indubitable respondan ao obxecto do convenio e se realicen durante o ano natural no que teña lugar a súa sinatura.

Poderán financiarse con cargo a este convenio os seguintes gastos:

- Gastos correntes consumibles non amortizables necesarios para a realización da actividade como:

- Gastos de persoal
- Aluguer (incluídos gastos de comunidade)
- Combustible e outros gastos de desprazamento



- Seguros: vehículos, voluntarios e locais
- Material de oficina non inventariable
- Material de reposto de máquinas, instalacións e equipos
- Teléfono e enerxía eléctrica
- Gastos de publicidade, sensibilización, consultoría e asesoría externa
- Outros gastos de similar natureza

2.- Non se poderán financiar os gastos que supoñan calquera tipo de investimento de ben inventariable.

NOVENA. Inexistencia de relación laboral

A subscripción deste convenio non implicará relación contractual ningunha entre a Consellería de Política Social e as persoas que desenvolvan as actividades que constitúen o obxecto daquel, de xeito que por este concepto non se lle poderá esixir responsabilidade ningunha, ni directa nin subsidiaria, polo acontecido no desenvolvemento do convenio.

DÉCIMA. Obtención doutras axudas

Toda alteración das condicións tidas en conta para a celebración deste convenio e, en todo caso, a obtención concorrente de subvencións ou axudas outorgadas por outras administracións ou entes públicos ou privados, nacionais ou internacionais, poderá dar lugar á modificación das condicións establecidas no presente convenio.

O importe da subvención non poderá en ningún caso ser de tal contía que, illadamente ou en concorrencia con subvencións ou axudas ingresos ou recursos doutras administracións públicas supere o custo das accións derivadas do convenio. Como regra xeral, permítese a acumulación de axudas, sempre que o importe total destas non supere o custe total do programa. Para tal fin, establecerase un sistema de estampillado dos xustificantes de gasto que permita o control da concorrencia de subvencións, con expresión da porcentaxe que se lle imputa, ben a totalidade ou a que lle corresponda.

DÉCIMO PRIMEIRA. Causas de resolución, reintegro e suspensión

Serán causas de resolución do presente convenio e darán lugar, no seu caso, ao reintegro das cantidades percibidas, incrementadas cos xuros legais establecidos de acordo coa normativa vixente:

- O incumprimento dalgunha das estipulacións contidas nas cláusulas do convenio.
- A aplicación dos fondos outorgados no convenio para fins distintos do que motivaron a súa concesión.
- A falta de xustificación do emprego das cantidades recibidas, ou a falsidade de datos achegados para este fin.





Igualmente, procederá o reintegro cando a entidade beneficiaria non cumpra os compromisos contraídos en virtude da sinatura deste convenio.

Aos efectos de reintegro das subvencións estarase ao disposto no título II da Lei 9/2007, do 13 de xuño, de subvencións de Galicia e no Decreto 11/2009, do 8 de xaneiro, polo que se aproba o regulamento de subvencións de Galicia.

Por razón de interese público, a Consellería de Política Social poderá suspender a execución do convenio, que requirirá a aprobación do Consello da Xunta, previo informe da Intervención Xeral.

Tamén poderá ser rescindido este convenio por calquera das partes mediante a súa denuncia con dous meses de antelación.

DÉCIMO SEGUNDA. Duración

A vixencia deste convenio iniciárase dende a súa sinatura ata o 31.12.2016. Non obstante estenderanse os seus efectos desde o 1 de xaneiro.

DÉCIMO TERCEIRA. Comisión de seguimento

Créase unha Comisión Mixta Paritaria para a avaliación e seguimento das accións estipuladas, que estará integrada por dous representantes da Dirección Xeral de Inclusión Social da Consellería de Política Social e por dous representantes de EAPN Galicia.

Esta Comisión Mixta, presidida por un dos representantes da Dirección Xeral de Inclusión Social, velará polo cumprimento dos obxectivos fixados no convenio.

DÉCIMO CUARTA. Carácter administrativo do convenio

O presente convenio terá carácter administrativo, rexéndose os seus efectos polo establecido nas súas cláusulas e no non previsto aplicaráselle os principios contemplados no Real decreto legislativo 3/2011, do 14 de novembro, polo que se aproba o texto refundido da Lei de Contratos do Sector Público, para resolver as lagoas e dúbidas que puidesen presentarse. Así mesmo, rexerase tamén pola Lei 38/2003, do 17 de novembro, xeral de subvencións, pola Lei 9/2007, do 13 de xuño, de subvencións de Galicia e polo Decreto 11/2009, do 8 de xaneiro, polo que se aproba o seu Regulamento.

A Administración gozará de todas as prerrogativas inherentes á natureza administrativa do convenio.

As cuestións litixiosas xurdidas acerca da interpretación, modificación ou efectos do convenio serán resoltas pola Consellería de Política Social poñendo os seus acordos fin á vía administrativa, cabendo contra elas, recurso potestativo de reposición, no prazo dun mes ante o mesmo órgano que ditou a resolución, segundo o previsto na Lei 30/1992, do 26 de novembro, de réxime xurídico das administracións públicas e do procedemento administrativo común, modificada pola Lei 4/1999, do 13 de xaneiro; ou poderá interpoñerse directamente



recurso contencioso-administrativo, no prazo de dous meses contados desde o día seguinte ao da notificación do acto que poña fin á vía administrativa, se fose expreso. Se non o fora, o prazo será de seis meses e contarase, para o solicitante e outros posibles interesados, a partir do día seguinte a aquel en que, de acordo coa súa normativa específica, se produza o acto presunto, de conformidade co disposto na Lei 29/1998, do 13 de xullo, reguladora da xurisdición contencioso-administrativa.

Para eses efectos o tribunal competente será o Tribunal Superior de Xustiza de Galicia.

DÉCIMO QUINTA. Publicidade no Portal de Transparencia e Goberno Aberto

As partes asinantes autorizan a publicidade dos seus datos persoais e demais especificacións recollidas no presente convenio de colaboración no Portal de Transparencia e Goberno Aberto.

De conformidade coa Lei 38/2003, do 17 de novembro, xeral de subvencións, o convenio de colaboración e a información sobre a subvención serán comunicados á Base de Datos Nacional de Subvencións (BDNS).

E en proba de conformidade cos termos do convenio, as partes asínano e rubricano, por triplicado, no lugar e na data indicados na cabeceira.

O Conselleiro de Política Social

José Rey Varela

O Presidente de EAPN Galicia

Antonio Hernández Fernández